



Broj: 01/1-02-3131/18
Breza, 29.11.2018. godine

Z A P I S N I K

Sa DVADESETČETVRTE REDOVNE SJEDNICE Općinskog vijeća održane dana 28.11.2018. godine sa početkom u 16,30 sati u prostorijama Općine Breza- Sala Općinskog vijeća.

Sjednicom je predsjedavao predsjedavajući Općinskog vijeća Jusić Vedad.

Po izvršenoj prozivci konstatovano je da sjednici Općinskog vijeća prisustvuje 19 vijećnika.

Opravdano odsutna Jekalović Amina a vijećnik Bajrić Fetah najavio kašnjenje.

Osim vijećnika sjednici Općinskog vijeća su prisustvovali: Općinski načelnik Munib Zaimović, pomoćnici Općinskog načelnika: Smajila Omerhodžić, Meliha Beširević, Salih Hasanspahić, Herco Huso, predstavnici koordinacionog tima za izradu Strategije Amela Tutnjević-Gaćanović i Dervišević Eldina, predstavnica firme „Firing“ d.o.o Visoko Melina Karamehić, predsjednik Etičkog odbora, predsjednik SDP stranke općinski odbor Breza te predstavnik radio Breze.

Predsjedavajući Općinskog vijeća upoznao je vijećnike da je održan sastanak komisije za Statut i propise i komisije za Budžet i finansije te su mišljenja dostavljena vijećnicima. Isto tako je upoznao vijećnike da je od strane Udruženja RVI BiH stigao dopis o protokolu obilježavanja 3. Korpusa Armije BiH.

Od strane Udruženja izbornih zvaničnika BiH stigao je dopis da je potrebno da 29.11.2018. sa početkom u 12,30 prisustvuje radionici u prostorijama MSS te je potrebno odrediti predstavnika Općinskog vijeća, te je dogovoreno da radionici prisustvuje Bulbulušić-Muratović Nejira.

Zatim se pristupilo razmatranju i usvajanju Zapisnika sa 23. redovne sjednice Općinskog vijeća Breza.

Primjedbe na Zapisnik nije bilo te se nakon toga pristupilo glasanju gdje je konstatovano da je Zapisnik sa 23. redovne sjednice usvojen jednoglasno sa 19 glasova ZA.

Zatim se prešlo na odgovore na vijećnička pitanja.

Vijećnik Avdić Edin je dao svoj komentar na odgovore na postavljena vijećnička pitanja te je konstatovao da se odgovori daju samo da zadovolje formu a u suštini se ništa ne poduzima po istim. Analizom datih odgovora vidi se da su pomoćnici pod uticajem izvršne vlasti tako da od podnešenih vijećničkih pitanja ne može se očekivati krajnji ishod i poboljšanje stanja na terenu po određenim pitanjima. Također je konstatovao da je potrebno kod razmatranja Izvještaja o radu Općinskog načelnika ocijeniti rad šefova službi.

Vijećnik Sirotanović Arif također nije zadovoljan odgovorom kojeg je dobio od strane Općinske izborne komisije te da mu nije odgovoreno na pitanje koje je postavio. Predlaže održavanje tematske sjednice po pitanju izbornih aktivnosti kako bi se otklonili nedostaci i propusti u provođenju izbora a posebno je stavio akcenat na ažuriranje biračkog spiska.

Predsjedavajući Općinskog vijeća predlaže vijećniku Sirotanović Arifu da pokrene inicijativu o održavanju tematske sjednice koja će se razmatrati na kolegiju Općinskog vijeća koji će ocijeniti da li je potrebno održavanje tematske sjednice.

Vijećnik Buljetović Ćamil podržava diskusiju vijećnika Avdić Edina te ističe da je i sam uvidio da su vijećnička pitanja formalnost sa kojim se ništa ne postiže.

Radu vijeća priključio se vijećnik Bajrić Fetah u 16,45 sati.

Vijećnik Bajrić Fetah istakao je da za razliku od drugih vijećnika on nije dobio nikakav odgovor na svoje vijećničko pitanje a na sjednici Općinskog vijeća se o istim komentariše. Isto tako navodi da Općinske službe imaju podatke te mogu dati tražene odgovore a ne samo o istim komentarisati na sjednici. Istakao je da će traženi odgovor dobiti na drugi način.

Na pitanje koje se odnosi na pokretanje krivične odgovornosti odgovor nije tražio od Stručne službe Općinskog vijeća nego od Općinskog načelnika. Te konstatuje da Općinski načelnik ima uticaj na date odgovore.

Općinski načelnik predlaže, ako je potrebno, da se zakaže tematska sjednica po pitanju pokretanja i vođenja krivične odgovornosti.

Vijećnik Kadrić Memsud istakao je da vijećnici Općinskog vijeća postavljaju pitanja na koja u 90% slučajeva znaju odgovor. Predlaže da vijećnici ukoliko žele da postave neko vijećničko pitanje i inicijativu, za čiju realizaciju su potrebna novčana sredstva, da to učine sada kada je u fazi izrada Prijedloga budžeta Općine Breza za 2019. godinu, kako bi se pitanja i inicijative mogli realizovati.

Vijećnik Buljetović Ćamil je dao komentar na pojedine izjave i podjelu na „mi“ i „oni“ i istakao da je Općinski organ i Općinsko vijeće jedinstven organ i da svi trebamo djelovati jedinstveno u interesu građana, te da su Općinski službenici dobro plaćeni za svoj rad te trebaju da sprovedu politiku koju utvrdi Općinsko vijeće.

Zatim se prešlo na postavljanje novih vijećničkih pitanja i inicijativa.

U okviru vijećničkih pitanja Bajrić Fetah je usmeno postavio pitanje koje se odnosi na to: „Ko je dao saglasnost da se povuče bankovna garancija na izvedene radove na vodovodu Dadjevac.“

Vijećnik Sirotanović Arif također je usmeno pokrenuo inicijativu da se izvrši sanacija autobuskih stajališta na lokalitetu Podžupča.

Ponovo je tražio dopunu već postavljenog vijećničkog pitanja koje se odnosi na obrasce za imenovanje biračkih odbora od strane političkih subjekata.

Safet Zahirović u ime Stručne službe OV upoznaje vijećnike sa zakonskom regulativom koja se odnosi na postavljanje vijećničkih pitanja da te da vijećnici imaju pravo postavljati pitanja u onim okvirima kako je propisano i iz nadležnosti izvršnog organa te javnih preduzeća i ustanova gdje je osnivač Općinsko vijeće. Također je dao komentar na postavljeno vijećničko pitanje od strane vijećnika Sirotanović Arifa a koji se odnosi na provođenje izbornih aktivnosti za protekle izbore.

Vijećnik Ahmedspahić Mirza je u pismenoj formi pokrenuo dvije inicijative. Prva inicijativa se odnosi na to da se razmotri mogućnost da od sljedeće sjednice OV, prije početka sjednice, se intonira himna BiH. Druga inicijativa se odnosi na sanaciju puta i ucijevljenje potoka u tunelu Kamenice koji povezuje Kamenice i Kahve.

Nakon postavljanja vijećničkih pitanja prešlo se na utvrđivanje dnevnog reda.

Predsjedavajući Općinskog vijeća predložio je dopunu dnevnog reda, da se kao 15. tačka dnevnog reda razmatra Odluka o učestvovanju na ročištu za prodaju nekretnine izvršenika „Elektroterma“ d.d. Breza, u svojstvu ponuđača i pribavljanju nekretnine u vlasništvo Općine Breza.

Nakon provedenog postupka glasanja konstatovano je da je dopuna dnevnog reda usvojena sa 13 glasova ZA, 6 SUZDRŽANI i 1 glasom PROTIV.

Nakon toga pristupilo se glasnju za predloženi dnevni red sa datom izmjenom te je nakon provedenog postupka glasanja konstatovano da je sa 19 glasova ZA i 1 SUZDRŽANIM usvojen sljedeći:

D N E V N I R E D

1. Usmena Informacija Općinskog načelnika između dvije sjednice
2. Razmatranje i usvajanje prijedloga Odluke Strategije integriranog razvoja Općine Breza za period 2019.-2027. godine
3. Razmatranje Nacrta Plana zaštite od požara općine Breza i donošenje zaključka po istom;
4. Razmatranje Programa pokrića budžetskog deficita Općine Breza;
5. Razmatranje Informacije o izvršenju Budžeta Općine Breza za period 01.01.2018. - 30.09.2018. godine
6. Razmatranje Nacrta Budžeta Općine Breza za 2019. godinu sa Dokumentom okvirnog Budžeta 2019-2021 i donošenje zaključka po istom;
7. Razmatranje i usvajanje prijedloga Odluke o davanju naziva mostu na rijeci Stavnji u ulici 6. april.
8. Razmatranje i usvajanje prijedloga Odluke o utvrđivanju javnog interesa za izgradnju pretovarne stanice komunalnog otpada;
9. Razmatranje i usvajanje prijedloga Odluke o dodjeli u zakup poslovnih prostorija u zgradi Partizan
10. Razmatranje i usvajanje prijedloga Odluke o uvjetima, načinu i postupku prodaje neizgrađenog gradskog građevinskog zemljišta u vlasništvu Općine Breza, putem javnog nadmetanja – licitacije;
11. Razmatranje Nacrta Odluke o Općinskim komunalnim taksama i donošenje zaključka po istoj;
12. Razmatranje Nacrta Odluke o Komunalnom redu i donošenje zaključka po istoj;
13. Davanje saglasnosti na dopunu programa utroška sredstava sa kriterijima raspodjele sredstava „Podsticaj poljoprivrednoj proizvodnji“ utvrđenih budžetom Općine Breza za 2018. godinu, konto 614414.
14. Razmatranje dopisa Skupštine ZDK u vezi prijedloga Programa rada Skupštine za 2019. godinu.
15. Odluka o učestvovanju na ročištu za prodaju nekretnine izvršenika „Elektroterma“ d.d. Breza, u svojstvu ponuđača i pribavljanju nekretnine u vlasništvo Općine Breza.

Ad.1

Usmena Informacija Općinskog načelnika između dvije sjednice;

Općinski načelnik u svom obraćanju je upoznao vijećnike o aktivnostima koje je vodio u proteklom periodu. Pored redovnih aktivnosti rađeno je na završetku započetih projekata kao i pokretanju i realizaciji novih projekata koje su planirane u proteklom periodu te se može sa zadovoljstvom konstatovati da će planirani poslovi biti završeni onako kako je predviđeno.

Ad 2.

Razmatranje i usvajanje prijedloga Odluke Strategije integriranog razvoja Općine Breza za period 2019.-2027. godine.

Koordinator projekta Dervišević Eldina istakla je da je u postupku donošenja ovog dokumenta veliko učešće uzeo i UNDP koordinator Amela Tutnjević-Gaćanović. Strategija

razvoja Općine Breza za period 2019. do 2027. godine planski strateški dokument koji se temelji na dugoročnim strateškim ciljevima i njegova svrha je da inicira integrisani rast i razvoj općine Breza uzimajući u obzir društveni, ekonomski i okolinski aspekt razvoja. Istekom perioda važenja prethodne općinske Strategije razvoja zasnovane na poštivanju ljudskih prava (2006.-2011), tokom prethodne 2017. godine donesene su sve potrebne odluke i otpočeo je proces izrade nove Strategije razvoja Općine Breza 2019-2027.godine u skladu sa Metodologijom integriranog lokalnog razvoja (MiPRO) koja je opće-prihvaćena na nivou jedinica lokalne samouprave u Bosni i Hercegovini. Pravni temelj Strategije je u odredbama Zakona o načelima lokalne samoupraveu Federaciji BiH («Službene novine Federacije Bosne i Hercegovine», broj: 49/06 i 51/09). Proces strateškog planiranja u Općini je iniciran uspostavljanjem Razvojnog tima kao glavnog operativnog, izvršnog i koordinacionog tijela za izradu Strategije, sastavljenog od predstavnika lokalne uprave, javnih ustanova, kao i predstavnika privrednog i nevladinog sektora. Pored Razvojnog tima, koji je imenovan od strane Općinskog načelnika, imenovane su i sektorske grupe, po jedna za svaki od tri ključna sektora (ekonomski, društveni i sektor zaštite i unapređenja okoline) te Partnerska grupa.

Kroz izradu Strategije razvoja općine Breza analizirano je socio-ekonomsko stanje u kojem se trenutno nalazi lokalna zajednica pri čemu su prikupljeni i obrađeni relevantni podaci o demografskom stanju, stanju privrede, infrastrukture, javnih i komunalnih usluga, kao i stanje prirodnih resursa, na osnovu čega su definirane vizija, strateški i sektorski ciljevi te konkretni projekti i mjere koji će voditi rast i razvoj Općine u narednom periodu.

Strateško planiranje je jedno od temeljnih načela lokalnog razvoja i Strategija integriranog razvoja općine Breza će u narednoj deceniji usmjeravati održivi razvoj Breze na transparentan i participativan način. Na kraju izlaganja se zahvalila se svim onim koji su uzeli učešće u kreiranju ovog dokumenta.

Vijećnik Avdić Edin pohvalio je donošenje i izradu ovog dokumenta i istakao je da se ova Strategija u narednom periodu može mijenjati i dopunjavati a što je najvažnije da se provede onako kako je planirano. Predlaže da se napravi presjek „Breza prije Strategije“ i „Breza poslije Strategije“ kako bi se vidjeo uticaj donesenog dokumenta. Prokomentarisao je i činjenicu da je u dokumentu očito da veći dio Općine spada u kategoriju ruralno područje (nerazvijeno). Može se zaključiti da su najodgovorniji za ovo stanje u kontinuitetu bivši načelnici Općine a jednim dijelom i Općinska vijeća. Nedostatak se ogleda u nepostojanju osnovnih infrastrukturnih objekata: vodosnadbijevanja, kanalizaciona i putna infrastruktura i sve ostalo što je neophodno za normalan život u 21. vijeku. U razvoju Breze nije bilo vizije za njen razvoj, dosadašnji budžeti nisu bili razvojnog karaktera. Zabrinjavajući je i podatak da broj umrlih lica starosne dobi iznad 65. je povećan a povećan je i odlazak mladih radno-sposobnih stanovnika. Postavio je pitanje koliko će donošenje ove Strategije uticati na povećanje zaposlenosti i povećanje prihoda u budžetu Općine Breza. Također je prokomentarisao kako je moguće da manji dio zaposlenih u realnom sektoru daju veći doprinos u stvaranju dohotka u odnosu na veliki administrativni aparat u državnom sektoru koji ima znatno manje rezultate u stvaranju istog.

Vijećnik Sokić Dževahid istakao je da je Strategija razvoja sa svoje 123. stranice dobar, obiman materijal koji daje smjernice za daljni razvoj Općine. U istom se vidi historija, sadašnjost i budućnost razvoja Općine. Najveći problem ogleda se u odlasku radno sposobnog stanovništva obzirom da je snaga u ljudima. Zabrinjavajući je i odnos mortaliteta i nataliteta. U Strategiji je razrađeno kako zadržati radno sposobno stanovništvo.

(Sjednicu vijeća napustio uz dopuštenje Bajrić Fetah u 17,50)

Vijećnik Kadrić Memsud također je istakao da je Strategija razvoja jedan od najvažnijih dokumenata Općine te da bude pravac i vodilja rada svakog načelnika Općine.

Vijećnik Salčinović Fikret pohvalio je ovaj dokument pogotovo što je prilikom donošenja korištena „svot“ analiza. Istom je trasiran put za naredni period te važno je da vijeće prepozna šta bi se moglo činiti.

Vijećnik Avdić Edin predlaže ukoliko je moguće da se u Strategiju unese u dijelu provođenja zdravstvene zaštite da se poveća preventivno djelovanje te da se radi na promociji.

Koordinator projekta Dervišević Edina istakla je da će se donošenjem Strategije broj zaposlenih na godišnjem nivou povećati za 6%.

Pomoćnik Općinskog načelnika Beširević Meliha istakla je da je i ona bila učesnik u donošenju Strategije te se zahvaljuje svima koji su učestvovali u donošenju ovakvog dokumenta te da sada imamo viziju razvoja Općine.

Učesnika u raspravi nije bilo te je nakon provedenog postupka glasanja konstatovano da je Odluka Strategije integriranog razvoja Općine Breza za period 2019.-2027. godine. usvojena jednoglasno sa 19 glasova ZA.

Ad.3

Razmatranje Nacrta Plana zaštite od požara Općine Breza i donošenje zaključka po istom.

Detaljnu prezetanciju Nacrta Plana zaštite od požara dala je predstavница firme „Firing“ d.o.o Visoko Melina Karamehić koja je pojasnila pravni osnov za donošenje ovog dokumenta, te je istakla da se Plan zaštite od požara sastoji se od tekstualnog i grafičkog dijela. Tekstualnim dijelom plana uređen je način postupanja vatrogasnih jedinica i drugih učesnika u akciji gašenja požara. Izrada grafičkog dijela Plana zaštite od požara za građevine i prostore vršena je u skladu sa Uredbom Vlade Federacije BiH o sadržaju, označavanju i čuvanju, kontroli i nostrifikaciji investiciono - tehničke dokumentacije ("Službene novine Federacije BiH", broj 33/10), a u vezi sa članom 35. Uredbe o sadržaju i načinu izrade planova zaštite i spašavanja od prirodnih i drugih nesreća i planova zaštite od požara.

U grafičkom dijelu Plana zaštite od požara korišteni su simboli, oznake i boje prema važećim propisima, s tim da se simboli, oznake i boje nisu koristili u nekim djelovima zbog uticaja na prepoznatljivost tehnološkog postrojenja, odnosno instalacija i zbog umanjena prepoznatljivosti vatrogasnih simbola i oznaka na planu zaštite od požara. U svom izlaganju iznijela je: osnovne podatke o Općini Breza, tekstualni dio plana, mjere za postizanje potrebnog nivoa zaštite od požara, mjere obezbjeđenja izvršenja plana, način izrade, usklađivanja kao i ažuriranje i čuvanja plana zaštite od požara.

(Radu vijeća priključio se vijećnik Bajrić Fetah u 18,20)

Vijećnik Avdić Edin pozdravio je donošenje ovog dokumenta a naročito je pohvalio što su u istom predviđene preventivne mjere. Postavio je pitanje kako su riješeni problemi u objektima kolektivnog stanovanja obzirom da znamo stanje u istim.

Gospođa Karamehić objasnila je da su ovim objektima, preko 4 stana, predviđene hidrantske mreže te da je ovo veoma teško provesti obzirom da naše zgrade nemaju kućne savjete koji će voditi računa o tome.

Predsjedavajući Općinskog vijeća predložio je sljedeći:

ZAKLJUČAK

I

UTVRĐUJE SE Nacrt plana zaštite od požara.

Po utvđenom Nacrtu Plana zaštite od požara, sprovesti javnu raspravu sa vijećnicima, privrednicima, predsjednicima mjesnih zajednica i ostalim zainteresovanim licima Općine Breza.

II

Javnu raspravu sprovesti u periodu 01.12.2018. do 20.12.2018.

III

Za realizaciju zaključka zadužuje se Služba Civilne zaštite

Nakon provedenog postupka glasanja konstatovano je da je Zaključak usvojen jednoglasno sa 20 glasova ZA.

Usljedi je pauza od 18,30 do 19,00h.

Ad.4

Razmatranje Programa pokriva budžetskog deficita Općine Breza;

Učesnika u raspravi nije bilo i Programa pokriva budžetskog deficita Općine Breza primljen je na znanje.

Ad.5

Razmatranje Informacije o izvršenju Budžeta Općine Breza za period 01.01.2018. - 30.09.2018. godine;

Informacija primljena na znanje, bez učesnika u raspravi.

Ad.6

Razmatranje Nacrta Budžeta Općine Breza za 2019. godinu sa Dokumentom okvirnog Budžeta 2019-2021 i donošenje zaključka po istom;

Vijećnik Kadrić Memsud poziva vijećnike da ukoliko žele postaviti neko vijećničko pitanje i inicijativu, za čiju realizaciju su potrebna novčana sredstva da to učine sada kada je u fazi izrada Prijedloga budžeta Općine Breza za 2019. godinu, kako bi se pitanja i inicijative mogli realizovati.

Predsjedavajući Općinskog vijeća također je podsjetio vijećnike da ukoliko ne mogu doći na javnu raspravu po Nacrtu Budžeta Općine Breza za 2019. godinu svoje prijedloge, sugestije i mišljenja dostave u nadležnu službu. Također je istakao da vijećnici ukoliko budu htjeli da ulože amandmane za Budžet Općine Breza za 2019. godinu da to urade u propisanom roku kako bi nadležna služba mogla proučiti uloženi amandman i o istom se očitovati.

Nakon toga predložen je zaključak.

ZAKLJUČAK

I

UTVRĐUJE SE Nacrt Budžeta Općine Breza za 2019.godinu.

Po utvrđenom Nacrtu Budžeta Općine Breza za 2019.godinu sprovesti javnu raspravu sa vijećnicima i svim korisnicima Budžeta Općine Breza.

II

Javnu raspravu sprovesti u periodu od 01.12.2018. do 19.12.2018.godine

III

Za realizaciju zaključka zadužuje se Općinski načelnik i Služba za finansije, inspekcijske poslove i opću upravu.

Nakon provedenog postupka glasanja konstatovano je da je Zaključak o utvrđivanju Nacrta Budžeta Općine Breza za 2019.godinu. usvojen sa 20 glasova ZA.

7
Ad 7.

Razmatranje i usvajanje prijedloga Odluke o davanju naziva mostu na rijeci Stavnji u ulici 6. april.

Predsjedavajući Općinskog vijeća upozna je vijećnike da je provedena zakonska procedura te daje Općinskom vijeću na usvanje.

Učesnika u raspravi nije bilo te je nakon glasanja konstatovano da je Odluka o davanju naziva mostu na rijeci Stavnji u ulici 6. april. usvojena sa 19 glasova ZA i jednim SUZDRŽANIM.

Ad 8.

Razmatranje i usvajanje prijedloga Odluke o utvrđivanju javnog interesa za izgradnju pretovarne stanice komunalnog otpada;

Vijećnik Avdić Edin postavio je pitanje da li su ispunjeni svi zakonski uslovi za donošenje ove odluke.

Predsjedavajući Općinskog vijeća u ime stranke SDA ističe da podržavaju donošenje ove odluke ukoliko budu ispunjeni svi zakonom predviđeni uslovi.

Pomoćnik Općinskog načelnika Smajila Omerhodžić pojasnila je da se ovom Odlukom pokreće postupak u kojem će biti pribavljene sve zakonom potrebne saglasnosti i uslovi te ukoliko se ispune kreće se u dalju proceduru.

Učesnika u raspravi više nije bilo te je nakon glasanja konstatovano da je Odluka o utvrđivanju javnog interesa za izgradnju pretovarne stanice komunalnog otpada usvojena sa 20 glasova ZA.

Ad 9.

Razmatranje i usvajanje prijedloga Odluke o dodjeli u zakup poslovnih prostorija u zgradi Partizan.

Vijećnik Suljagić Mirzet pojasnio je da je od strane Udruženja Merhamet iz ZDK upućen dopis Udruženju Merhamet iz Breze da je potrebno obezbijediti prostor na duži vremenski period kako bi isti mogli aplicirati za dobijanje sredstava za adaptaciju i opremanje kuhinje i prostora Udruženja Merhamet iz Breze. U tom cilju potrebno je donijeti Odluku kojom će se objekat dodijeliti na korištenje na duži vremenski period.

Predsjedavajući Općinskog vijeća istakao je da je upoznat sa ovim dopisom te je na klubu dogovoreno da se ovaj prostor dodijeli Merhametu a sugeriše da se u Odluku ugradi da se ovaj rok produži i nakon isteka mandata akutelnog načelnika i vijeća, kako bi se moglo aplicirati za dobijanje ovih sredstava.

Vijećnik Buljetović Ćamil je protiv ovog prijedloga te je istakao da je Merhamet zalutao u ove prostorije i da su iste koristili pripadnici šahovskog kluba Breza te predlaže da se prostor vrati prijašnjim korisnicima a da se za potrebe kuhinje Merhamet iznađe novi i adekvatniji prostor.

Učesnika u raspravi više nije bilo pa je nakon glasanja konstatovano da je Odluka usvojena sa 19 glasova ZA i jednim PROTIV.

Ad 10.

Razmatranje i usvajanje prijedloga Odluke o uvjetima, načinu i postupku prodaje neizgrađenog gradskog građevinskog zemljišta u vlasništvu Općine Breza, putem javnog nadmetanja – licitacije;

Vijećnik Avdić Edin zatražio je pojašnjenje ko je inicijator za prodaju navedenog građevinskog zemljišta. Mišljenja je da je pogrešno da se ova lokacija prodaje kao tri parcele i predlaže da to bude jedna parcela na kojoj će se izgraditi jedan veći objekat za potrebe

stanovanja mladih bračnih parova po povoljnijim uslovima čime bi zaustavili odlazak mladih stručnih kadrova. Ističe da neće glasati za ovu odluku.

Vijećnik Bajrić Fetah pita zašto se prodaju odmah sve tri lokacije i zašto se ne proda jedna lokacija kako bi se vidjelo interesovanje i cijena iste pa tek onda prodaja ostalih lokacija. Također ističe da neće podržati ovu Odluku.

Predsjedavajući Općinskog vijeća pojasnio je da je važno da su vijećnici OV usvojili na jednoj od prethodnih sjednica Regulacioni plan kojim su predviđene ove lokacije a po proceduri vještak građevinske struke odredio je tržišnu cijenu zemljišta te smatra da nema ništa sporno i da je sve urađeno u skladu sa zakonom.

Pomoćnik Općinskog načelnika Smajila Omerhodžić pojasnila je da cijenu jednog metra kvadratnog određuje vještak na osnovu potrebnih parametara i da OV ne može odrediti cijenu zemljišta.

Učesnika u raspravi više nije bilo pa je nakon glasanja konstatovano da je Odluka o uvjetima, načinu i postupku prodaje neizgrađenog gradskog građevinskog zemljišta u vlasništvu Općine Breza, putem javnog nadmetanja – licitacije usvojena sa 13 glasova ZA i 7 SUZDRŽANIH.

Ad 11.

Razmatranje Nacrta Odluke o Općinskim komunalnim taksama i donošenje zaključka po istoj;

Predsjedavajući Općinskog vijeća pojasnio je vijećnicima da će se po Nacrtu ove Odluke održati javna rasprava te da po istoj učestvuju i daju svoje primjedbe i sugestije obzirom da se radi o bitnoj Odluci te predlaže sljedeći:

ZAKLJUČAK

I

UTVRĐUJE SE Nacrt Odluke o komunalnim taksama.

Po utvrđenom Nacrtu Odluke o komunalnim taksama, sprovesti javnu raspravu sa vijećnicima, privrednicima, predsjednicima mjesnih zajednica i ostalim zainteresovanim licma Općine Breza.

II

Javnu raspravu sprovesti u periodu od 01.12.2018. do 19.12.2018.godine

III

Za realizaciju zaključka zadužuje se Služba za privredu.

Nakon provedenog postupka glasanja konstatovano je da je zaključak o utvrđivanju Nacrta Odluke o Općinskim komunalnim taksama usvojen sa 19 glasova ZA i jednim SUZDRŽANIM.

Ad 12.

Razmatranje Nacrta Odluke o Komunalnom redu i donošenje zaključka po istoj;

Predsjedavajući Općinskog vijeća i po ovoj tački dnevnog reda pojasnio je vijećnicima da će se po Nacrtu Odluke o Komunalnom redu održati javna rasprava te da po istoj učestvuju i daju svoje primjedbe i sugestije, i predlaže sljedeći:

9
ZAKLJUČAK

I
UTVRĐUJE SE Nacrt Odluke o komunalnom redu.

Po utvrđenom Nacrtu Odluke o komunalnom redu, sprovesti javnu raspravu sa vijećnicima, privrednicima, predsjednicima mjesnih zajednica i ostalim zainteresovanim licima Općine Breza.

II
Javnu raspravu sprovesti u periodu od 01.12.2018. do 19.12.2018.godine

III
Za realizaciju zaključka zadužuje se Služba za privredu.

Nakon provedenog postupka glasanja konstatovano je da je Zaključak o utvrđivanju Nacrta Odluke o Komunalnom redu usvojen jednoglasno sa 20 glasova ZA.

Ad 13.

Davanje saglasnosti na dopunu programa utroška sredstava sa kriterijima raspodjele sredstava „Podsticaj poljoprivrednoj proizvodnji“ utvrđenih budžetom Općine Breza za 2018. godinu, konto 614414.

Vijećnik Bajrić Fetah je protiv ovakvog prijedloga bez podatka koliko na terenu ima muznih krava i junica i koliko će se sredstava isplatiti. Predlaže da se podsticaj uplaćuje za registrovane poljoprivredne proizvođače kojima će se uplaćivati doprinosi.

Predsjedavajući Općinskog vijeća pojasnio je da se radi o 15.000 KM novčanih sredstava koje su bile predviđene za podizanje plastenika a koje su ostale neutrošene te predlaže da dio sredstava u iznosu od 10.000 KM isplati poljoprivrednicima koji prodaju mlijeko a ne onima koji samo drže muzne krave a 5.000 KM novčanih sredstava da se raspiše javni konkurs na kojem će učestvovati registrovani poljoprivredni proizvođači.

Pomoćnik Općinskog načelnika Salih Hasanspahić pojasnio je da poljoprivredni podsticaj nije socijalna kategorija te da se ista ne dodjeljuje socijalno ugroženim proizvođačima nego da se ista dodjeljuje za podsticaj poljoprivredne proizvodnje. Također je istakao da je u dosadašnjem programu izvršena uplata doprinosa za registrovane poljoprivredne proizvođače.

Nakon toga data je saglasnost za dopunu programa utroška sredstava sa kriterijima raspodjele sredstava „Podsticaj poljoprivrednoj proizvodnji“ utvrđenih budžetom Općine Breza za 2018. godinu, konto 614414. te je konstatovano da je isti usvojen jednoglasno sa 20 glasova ZA.

Ad 14.

Razmatranje dopisa Skupštine ZDK u vezi prijedloga Programa rada Skupštine za 2019. godinu.

Predsjedavajući Općinskog vijeća upozna je vijećnike da su dužni da do 03.12.2018. godine u Stručnu službu OV dostave svoje prijedloge, mišljenja i sugestije za Program skupštine ZDK za 2019. godinu, kako bi Stručna služba dostavila date prijedloge u predviđenom roku. Svoje prijedloge, sugestije i mišljenja mogu dostaviti i sami na adresu Skupštine ZDK.

Ad 15.

Odluka o učestvovanju na ročištu za prodaju nekretnine izvršenika „Elektroterma“ d.d. Breza, u svojstvu ponuđača i pribavljanju nekretnine u vlasništvo Općine Breza.

Pomoćnik Općinskog načelnika Smajila Omerhodžić pojasnila je da se Određuje da Općina Breza, tražilac izvršenja u izvršnom postupku koji se vodi pred Općinskim sudom u Visokom, pod brojem: 41 0 lp 047714 14 lp, učestvuje kao ponuđač na ročištu za prodaju nekretnine koja je označena kao: k.č. br. 522/2 k.o. Breza, upisana u zk. uložak broj: 1055 k.o. Breza, zv. Dvorište, a po kulturi Dvorište i poslovna zgrada, ukupne površine 1556 m², u vlasništvu izvršenika „Elektroterma“ d.d. Breza sa 1/1, upisana u Posjedovni list br. 130 k.o. Breza, utvrđene tržišne vrijednosti, po Komisiji za utvrđivanje prometne vrijednosti nepokretnosti, Službe Općinskog vijeća i Općinskog načelnika Općine Breza, broj: 01/1-02-2786/17 od 27.09.2017. godine, u iznosu od 149.240,00 KM. Odlučuje se da se nekretnina, označene u članu 1. ove Odluke, putem usmenog i javnog nadmetanja na ročištu za prodaju nekretnine izvršenika „Elektroterma“ d.d. Breza, pokušaju pribaviti u vlasništvo Općine Breza i to po cijeni od najviše 50.000,00 KM.

Učesnika u raspravi nije bilo te je nakon glasanja konstatovano da je Odluka o učestvovanju na ročištu za prodaju nekretnine izvršenika „Elektroterma“ d.d. Breza, u svojstvu ponuđača i pribavljanju nekretnine u vlasništvo Općine Breza usvojena jednoglasno sa 20 glasova ZA.

Ovim je iscrpljen dnevni red dvadesetčetvrte redovne sjednice Općinskog vijeća Breza, koja je sa radom završila u 20,00 sati.

Sastavni dio ovog zapisnika čini i tonski zapis sjednice.

ZAPISNIK SAČINILA
Zakira Smailbegović

PREDSJEDAVAJUĆI
Općinskog vijeća
Jusić Vedad